

魏耽

貞元中。吉州刺史魏耽。罷任居洛。有女子年甫十六。顏色甚美麗。夏中。俱納涼於庭。忽仰視天裂。有長人於裂處下。直至耽前。衣紫佩金。黑而髻。曰。我姓朱。天遣與君為女婿。耽不敢阻。請俟排比。再三乃許。約期後月。乃騰空而去。耽與其妻。雖甚憂迫。亦具酒食而俟之。有閹人突入拜耽。耽曰。何不秣馬而突入。太無禮也。閹人曰。竊見使君有憂色。故請言其事。耽曰。爾何要知之。閹人固請。耽因告之。閹人曰。使君不足憂。小事耳。言訖而出。佩金者及期而至。閹人復突入。佩金者見之。趨下再拜。閹人作色而叱曰。天怨爾。罰汝在人間。奈何又擾人如是。對曰。死罪。復拜。閹人輒升堂而坐。召佩金者坐。命酒。閹人於大沙鑼。取飲數器。器可三斗餘。飲訖。又取一鐵杵。折而嚼之。乃以沙鑼飲佩金者。佩金者甚有懼色。乃飲之。惟言死罪。更無他詞。閹人曰。送天獄禁百日。乃騰空而去。閹人曰。吾乃使君北斗本命星也。魏使君晝夜梵修。今乃報之。適無禮者。即賊星也。今已禁之。請去。無他慮。言訖而去。

張偃

進十張偃者。赴舉行。及金天王廟前。遇大雨。於廟門避雨。至暮不止。不及詣店。遂入廟中門宿。至四更。聞金天視事之聲。嗚嗚甚厲。須臾。聞喚張偃來。日午時。行至某村。為赤狸虎所食。偃聞之。甚懼。候庭下。靜。遂於門下匍匐而入。自通名。而拜。金天曰。汝生人何事而來。遂具以前事告。金天曰。召虎來。須臾。虎至。金天曰。與二大獸食。而代偃。虎曰。冤家合食。他物代之。不可。金天曰。檢虎何日死。有一吏來曰。未時。為某村王存射死。金天曰。命張偃過所食。時即行。及行至前路。果見人喧鬧。問之。乃曰。某村王存射殺赤狸虎。果金天所言。偃遂自市酒。求鹿脯。親往廟謝之。

畫工

唐進士趙顏。於畫工處得一軟障。圖一婦人甚麗。顏謂畫工曰。世無其人也。如何令生。某願納為妻。畫工曰。余神畫也。此亦有名曰真真。呼其名百日。晝夜不歇。即必應之。應則以百家彩灰酒灌之。必活。顏如其言。遂呼之。百日。晝夜不止。乃應曰。諾。急以百家彩灰酒灌。遂活。下

步。言笑飲食如常。曰。謝君召妾。妾願事箕帚。終歲生一兒。兒年兩歲。友人曰。此妖也。必與君為患。余有神劍可斬之。其夕。乃遺顏劍。劍纔及顏室。真真乃泣曰。妾南岳地仙也。無何。為人畫妾之形。君又呼妾名。既不奪君願。君今疑妾。妾不可住。言訖。攜其子。却上軟障。嘔出。先所飲百家彩灰酒。觀其障。唯添一孩子。皆是畫焉。

李文敏

唐李文敏者。選授廣州錄事參軍。將至州。遇寇殺之。沈於江。俘其妻崔氏。有五歲。隨母而去。賊即廣州都虞候也。其子漸大。令習明經。甚聰俊。詣京。赴舉。下第。乃如華州。及渭南縣東。馬驚。走不可制。及夜。入一莊中。遂投莊宿。有所衣天淨紗汗衫半臂者。主姬見之。曰。此衣似頃年夫人與李郎送路之衣。郎既似李。即復似小娘子。取其衣視之。乃頃歲製時。為燈燼燒破。半臂帶猶在其家。遂以李文敏遭寇之事說之。此子罷舉。徑歸。問母。具以其事對。乃白官。官乃擒都虞候。繫而詰之。所占一詞。不謬。乃誅之。而給其物力。令歸渭南焉。

孔緯

魯國公孔緯入相後。言於甥姪曰。吾頃任兵部侍郎。與王晉公鏗充宏文館學士。判館事。上任後。巡廳。晉公乃言曰。余昔任兵部侍郎。與相國杜邠公。充宏文館直學士。判館事。暮春。留余看牡丹於斯廳內。言曰。此廳比令無逸。無逸乃邠公子。終全州刺史。居之。止要一間。今壯麗如此。子不知非久。須為灰燼。余聞此言。心常銘之。又語余曰。明公慎厚端誠。此座猶或庶幾。由公而下者。罹其事矣。以吾今日。而追念邠公之言。得其大概矣。是時昭宗纂承。緯入相。朝廷大體。掃地無餘。故緯感昔言。而傷時也。

靈應錄

于述

台州漁者

台州海壩有漁者。死信宿而活。云被人追往一處。入院宇中。見先舅氏在其間。似為世之曹吏。謂漁者曰。追者悞矣。姓名同爾。呼追者曰。是温州界某乙。速押斯人回去。當別之際。謂曰。舅在此。甚驅馳。為向骨肉間。言造楞嚴經。救拔。餘無所要。又戒之曰。爾之業不善。還世改求衣食。良久。有人報。上司有帖下。云來歲在戊子。諸道兵